



UNIVERSITÄTS-  
BIBLIOTHEK  
PADERBORN

**Forum Competens Quæstionibus ex Universo Jure  
selectis, atque ad praxin utilissimis illustratum, Seu  
Tractatus Canonico-Civilis**

**Friderich, Melchior**

**Ingolstadium, 1709**

Caput I. De Foro Domicilij.

---

[urn:nbn:de:hbz:466:1-61662](#)

quod diffamatus tanquam reus à diffamatore tanquam actore editionem instrumentorum petere possit. Longè minus ad restringendam regulam faciunt reliqua, quæ affert Specul. l. c. ut consideranti patebit. ut adeò optimè dixerit Lucius III. cit. C. 8. generale esse, ut actor forum rei sequatur.

## P A R S II.

### De Foro Ordinario Communi.

#### C A P U T I.

##### De Foro Domicilij.

##### §. I.

###### *Domicilium quomodo contrahatur.*

###### S U M M A R I U M.

92. *Discordia DD. quoad modos sortiendi Forum.*
93. *Divisio Domicilij in Commune & Privatum, Privati in Naturale & Accidentarium.*
94. *Ad Domicilium contrabendum requiritur animus habitandi stabiliter & habitatio.*
95. *Non item translatio majoris partis bonorum.*
96. *Nec habitatio per longum tempus.*
97. *Animus stabiliter habitandi quomodo requiratur.*
98. *Potest quis plura simul habere domicilia.*
99. *Non habet domicilium, qui profitetur se nolle habere.*
100. *Unde colligatur animus figendi domicilij.*
101. *Domicilium quandoque haberi potest absque habitatione.*
102. *Amittitur animo mutandi & actuali mutatione.*
92. *Præmissis ijs, quæ de Foro Competente universim, ac in genere, dici instituto nostro expediebat: exponendi nunc speciam*

tim

tim sunt modi, quibus illud sortimur, & jurisdictioni subjicimur. Modos hujusmodi & Fori genera *Glossa in L. haeres absens* 19. ff. *de Iudic.* tredecim enumerat, quibusdam omisssis, qui ponit jure poterant, & recensitis nonnullis, qui ab alijs diversi non sunt. Pauciores alij referunt, & ferè solum communies, extraordinariis neglegunt. Ut ordine ac ratione procedatur: divisionem sequendam duxi suprà factam n. 10. hac parte II. acturus de Foro Ordinario Communi, quo comprehendendo Forum Domicilij, Contractus, Delicti, Rei sitæ.

93. De Domicilio tanquam principali & alijs ampliore modo sortiendi forum acturus, triplex à legibus & interpretibus proditum invenio: Commune, quod erat Roma, velut communis Civium Romanorum sedes & patria; & privatum, idque vel naturale seu Originis, vel Accidentale & adscitum, seu habitacionis. Et hoc quidem duplex: unum Voluntarium, quod videlicet quisque sibi pro arbitrio eligit; alterum Necessarium, quod invitis statuitur, puta Relegatis. Utrumque hoc rursum duplex est: unum quod *quasi domicilium* dicitur, ac diuturnam in loco coniunctionem, non tamen stabilem ac perpetuam requirit: alterum, quod simpliciter *Domicilium* appellatur, ac stabili duntat & perpetua habitatione constituitur. Ab hoc tanquam præcipuo ac reliquis celebriore ordior.

94. De modo sortiendi domicilium acerrime disputant Interpretes, ut ait Menoch. *L. 2. de arbitrar. casu* 86. n. 1. Erant, qui in arbitrio Judicis collocarent, quandonam quis censendus esset domicilium constituisse, ut referunt Host. & Parior. *in C. ult. de Paroch. Socin.* *in C. ult. de Foro comp.* Dec. consil. 284. n. 11. Paris. *L. 3. conf.* 12. n. 17. Verum hæc opinio solum tunc procedit, quando dubium in aliquo casu est, sitne constitutum domicilium, an non. Ex communi omnium ferè DD. duo copulativè requiruntur, animus stabiliter habitandi, & ipsa habitatio. *L. postliminij* 5. §. 3. & *L. Nihil interest.* 26. ff. *de capt.* & *postl. revers.* Nam *in eodem loco*, ut dicitur *L. Civis* 7. *C. de incolis,* singulos habere

K 2

domi-

domicilium non ambigitur , ubi quis larem rerumque ac fortunarum suarum summam constituit , unde rursus non sit discessurus , si nihil avocet. Et juxta L. Senatores 2.C. ubi Senatores. ibi singulis respondendum est , ubi larem fovent , aut ubi majorem bonorum partem possident , & assiduo versantur. Non igitur sufficit sola voluntas alicubi stabiliter habitandi : quia *domicilium re & facto transfertur , non nuda contestatione* , ut ait JC. L. 20. ff. ad municipalem. Neque sola habitatio absque animo stabiliter habitandi. L. scire oportet 35. ff. eod. cit. L. 7.C. de incolis. Gloss. & DD. in L. est verum C. eod. Hinc Papin. L. libertus 17. §. 13. ff. ad municip. sola , inquit , *domus , quæ in aliena Circumstancia comparatur , domicilium non facit*. Quando igitur Mar. Socin. in C. fin. de Foro comp. à n. 27. &c cum ipso Farin. *Fragm. crim. p. 1. V. Domicilium n. 199.* ac alij , diversos modos acquirendi domicilij enumerant , nim. legem &c statutum , privilegium Principis , ademptionem dignitatis , ademptionem Prælaturæ , assumptionem Monachatūs , Clericatūs , Militiæ , Præturae , Professuræ , Successionem , Relegationem &c. sensus non est , quod illud per hæc sola acquiratur , sed quod quis vi ipsorum alicubi aut habitat stabiliter , aut habitare teneatur. Pariter quando DD. quoſ refert Farin. l. c. à n. 104. afferunt , per habitationem decennio continuatam , per translationem majoris partis bonorum &c. contrahi domicilium , non id ita accipiendum est , quasi per solam habitationem vel translationem bonorum domicilium acquiratur absque animo stabiliter habitandi , sed quod iste animus inde præsumatur , ut mox dicetur n. 100.

95. Non tamen requiritur ad acquirendum domicilium , ut quis eò , ubi habitat animo stabiliter permanendi , transferat maiorem suorum bonorum partem , uti requiri existimant Petr. Barbosa ad L. exigere dotem. ff. de Iudic. n. 62. sibi contrarius ad L. haberes absens §. fin. ff. cod. n. 78. Nec obstant cit. L. 7.C. de incolis verba: *ubi quis larem rerumque ac fortunarum suarum &c.* neque illa L. 2.C. ubi Senatores , ubi pleraque exemplaria loco disjunctivæ aut habent copulativam & leguntque , & ubi majorem bonorum

*rum partem possident.* Non enim ibi dicitur, domicilium acquiri, ubi quis habitat simûlque majorem bonorum partem habet, quasi hoc ultimum requiratur ad constituendum domicilium; sed solum, quod in dubio, an quis habuerit animum stabiliter habitandi, præter alias conjecturas sit etiam ista, quod quis bonorum suorum majorem partem ibi habet, ubi modo degit. Panorm. & Socin. II. cc.

96. Pariter necessarium non est, ut quis habitet per longum tempus: sufficit enim accessisse animo stabiliter habitandi. Panorm. l.c. Menoch. l.c. n. 2. Gutier. de Matr. casu. 463. n. 13. ac communis DD. Quando Jura videntur requirere decennium, intelligendum id est de præsumptione, quod scilicet in dubio, an quis accesserit animo figendi domicilium, intentio hujusmodi præsumatur ex commoratione decennali.

97. Hæc quamvis quæ legibus statuta, quæ communi DD. calculo recepta sint, aliqua tamen declaratione indigent. Dubitari potest. I. Quo sensu ad domicilium acquirendum requiratur animus stabiliter habitandi. Videri potest, eum non requiri: nam alias nemo fortiretur domicilium. Quis enim est, cui fixum sit nunquam illud & nullo in casu mutare? cum multa accidere possint, quæ aut cogant aut suadeant abire, & nullus non sit ita animo comparatus, ut ad ejusmodi eventus cogitet aliò migrare. Præterea Vagi, ut suprà dictum est, ubique sortiuntur domicilium, nec tamen animum habent alicubi stabiliter manendi: sic enim jam desinerent esse vagi. Respondetur, non requiri animum in loco domicilij stabiliter permanendi pro quo-cunque casu & eventu, sed solum tamdiu, quamdiu inde non avocet causa aliqua rationabilis. Ita Impp. cit. L. 7. C. de incolis declarant his verbis: *unde rursus non sit discessurus, si nihil avocet*, id est, stabiliter permanensur, nisi necessitas abire cogat vel rationabilis causa avocet. Sic Religiosi Ordinum Mendicantium quamvis stabilitatem loci non profiteantur, domicilium tamen & forum sortiuntur, ubi modo sunt: quia habent animum hic

K 3

per-

permanendi, donec Superiorum imperio aliò avocentur. Nec si his invitis aufugerent, domicilium propterea mutarent: quia proprià illud voluntate deserere nequeunt, & tenentur hīc manere: quod sufficit ad domicilium & forum retinendum. Paratio est de Clericis Beneficiarijs: hi enim cùm in loco Beneficij personalem residentiam requirentis domicilium & forum habeant C. *postulasti de Foro comp.* & ibi Butrio n. 6. Panor. n. 4. Felin. in C. *Dilectus 2. de Rescript.* n. 4. Innoc. in C. *Ex ore de privil.* n. 2. illud non mutant, quamdiu Beneficium retinent, tametsi vel suā culpā, vel privilegio aut statuto concedente, vel negotiorum, aliáve legitimā causā absint. Eadem universim ratio est de ijs, qui vel ex lege alicubi domicilium & forum habent, vel ex mandato Superioris, cuius jurisdictioni subtrahere se nequeunt, recedere non possunt, vel vi contractūs aut quasi contractūs manere alicubi tenentur, indéque aufugiunt. Vagi tametsi domicilium non habeant, habere tamen censentur, & forum ubique sortiuntur, ob rationes allatas suprà n. 75.

98. Secundò dubitatur, an quis plura simul domicilia habere possit. Ratio dubitandi est: quia sola domus domicilium non facit cit. L. 17. §. 13. ff. *ad municipalem*, sed requiritur habitatio cum animo perseverandi: qui autem plures ædes habet in diversis territorijs vel Parochijs sitas, modò in hac, modò in illa habitando, in neutro territorio stabiliter habitandi animum habet, & sic nec domicilium; vel si hoc animo in uno habitat, & ad alterum solum divertit quandoque aut negotiorum aut animi divertendi causā, non in isto, sed tantum in illo habet domicilium. Verùm *Iurisprudentibus placuit*, inquit Ulp. L. 6. ff. *ad municipalem*. §. 2. *duobus locis posse aliquem habere domicilium, si utrobique ita se instruxit, ut non ideo minus apud alteros se collocaſſe videatur*. Idem traditur L. Labeo 5. ff. eod. & supponit C. cùm quis 2. *de Sepult.* in 6. Non tamen sufficit habere domum in utroque loco. cit. L. 17. §. 13. sed requiritur, ut utrobique & qualiter habitet. cit. L. 5. §. 6. ac C. 2. Panor. in C. *Ex parte de Fo-*

ro comp. n. 8. Franc. in cit. C. 2. n. 1. Gloss. & DD. in C. dilectus 2. de Rescript. Navarr. consil. 2. n. 3. de cland. despont. Menoch. consil. 398. n. 23. & consil. 692. n. 21. Hæc tamen æqualitas non est mathematicè dimetienda, quasi necesse sit, ut in uno loco non plus uno die vel hebdomade, quam in alio habitet; sed moraliter, videlicet ut magnâ temporis parte, tametsi non æquali, utrobique habitet. Ant. Cucus L. 5. Inst. Mor. tit. 4. n. 186. Sanch. L. 3. de Matr. disp. 24. n. 3. Gutier. de Matr. p. 2. casu 64. cum Rosella, Palud. D. Anton. Silvestr. Margarita, ac alijs. Neque obest, quod dicebatur, quod talis non habeat animum stabiliter in uno loco habitandi: et si enim non habeat animum toto anni tempore habitandi, habet tamen animum stabiliter in singulis habitandi per magnam anni partem, v. g. per æstatem in uno, hyeme in altero, ut solent personæ nobiles in calidioribus regionibus. Hoc autem sufficit ad stabilem habitationem. Cæterum ex eo, quod quis plura domicilia habere potest, non sequitur, quod possit esse plurimum Civitatum civis: cum plus sit esse civem, quam incolam & subditum. Nam subditi quoque sunt illi incolæ, qui jure civium non gaudent, Germanis die hinder und beysassen / bey und Inwohner: larga tamen civium appellatione veniunt L. provinciales 190. & L. 2. 39. §. 2. ff. de V. S. & cum illis universitatem constituunt L. Mortuo 27. ff. de fidejuss. multisque eorum privilegijs gaudent Bart. tr. de Repressal. in 1. q. 5. Castr. in L. omnes populi 9. ff. de Iust. & Iure. ac dispositum in cive, ratione similitudinis inter eos existentis, locum etiam habere videtur in incola. L. Civiles 11. C. de Appell. L. Incola 29. ff. ad municip. Chassan. in Consult. Burg. rubr. 3. §. 7. V. & selon. n. 8. quam ob causam Statutis Civitatis, quas incolunt, obligantur. cit. L. 29. Gaill. L. 2. obs 35. à n. 2. Schönborn 3. polit. c. 34. V. Cæterum incola. Hoc modo subditus et si quis esse possit in pluribus locis, non tamen esse posse in pluribus civem, post Affict. Arnisæ. Besold. ac alios multis argumentis suadere conatur Knipschild L. 2. de Iur. Civit. Imper. c. 29. à n. 143.

99. Tertio dubitatur, an censeatur contraxisse domicilium, qui diu alicubi habitavit, professus tamen est, se nolle ibi domicilium figere. Standum esse hac ejus declaracione & incolam non censendum asserunt Gloss. & Jason *in §. sed istae. Inst. de Aet. n. 54.* Bald. *L. 4. cons. 313.* cum Bart. Dyn. Socin. Marsil. Angel. Tiraq. ac alijs, quos citat & sequitur Menoch. *de arbitrar. L. 2. casu 86. n. 6.* Addit Boer. *in L. Consentaneum C. quom. & quan. Index. n. 107.* tales non contrahere domicilium, etiamsi per mille annos habaret, quando clarum est, eum ibi esse animo recedendi. Et licet, ut vult Socin. *l. c.* eò transtulisset majorem bonorum suorum partem: eò quod in his, quæ ab animo nostro pendent, potius stetur declaracione expressâ, quam facto contrario. Bart. *in L. Non solum §. morte n. 17.* Jason *n. 14.* Rubeus *n. 216. ff. de novi op. nunt.* Ripa *in C. cum M. de Constit. n. 82.* Menoch. *l. c. n. 8.* Hinc tametsi domicilium quis habere possit in pluribus territorijs aut parochijs, ut modò dictum est: si tamen declararet, se velle domicilium tantum in uno loco habere, ibi duntaxat illud habebit, tametsi in altero loco diutiùs & frequentiùs commoretur. Castr. *in L. 2. C. ubi senator. n. 2. & DD. n. præc. allegati.* In Civitatibus tamen Germaniae passim domicilium & incolatus ex consuetudine vel statuto post annum acquiritur, cum diutiùs peregrini non tolerentur, si lapso anno jura civium redimere nolint. Gail. *L. 2. obs. 35. n. 8.* Gilhausen *in arb. Iudic. c. 1. p. 2. §. 2. n. 12.* Schönborn *3. polit. c. 34.* Knipschild *de Iur. Civit. Imp. L. 2. c. 29. n. 104.* nisi Studiorum vel negotij aut muneris ad tempus duntaxat suscepit causâ ibi commorentur.

100. Verum cum saepe, qui aliquò se conferunt, non exprimant, utrum accedant animo stabiliter habitandi, idcirco dubitatur quartò, unde iste animus colligatur. Varias conjecturas hic asserunt Interpp. cum ex legibus, tum ex ipsa natura petitas. Prima apud Romanos erat: si quis in aliqua urbe vel regione Larum foveret, id est, domum haberet cum Larario, seu Sacrario domestico, in quo Lares, & Dii penates ac peculiares colebantur.

*L. 2.*

L. 2. C. ubi Senat. & Clariss. Zanger de except. p. 2. c. 1. n. 21. Secunda, si quis alicubi majorem partem bonorum possideat. cit. L. 2. V. aut majorem. L. Vares 19. §. 2. ff. de Iudic. L. is qui s. §. 23. ff. ut in poss. leg. L. 1. C. ubi pet. tutor. C. Ex parte 63. de Foro comp. & ibi Innocent. Bald. L. 1. conf. 411. & L. 4. conf. 58. Tiraq. de retr. lignag. §. 36. Gl. 3. n. 7. simûlque ibi instructus ad habendum ibi habitet. L. 6. §. 2. L. 27. §. 2. ff. ad municipalem. Non enim sufficit, ut existimat Zang. l. c. n. 37. si bona ibi per alios possideat: sic enim quicunque bona alicubi sita habet, acquireret ibi domicilium, tametsi aut nunquam aut raro duntaxat ad res suas curandas eò veniret. Tertia, ac priori affinis est, si rebus, quas alibi habuit, venditis huc venit cum familia, & tota aut majore bonorum substantia, atque hic habitet: censetur enim hic elegisse domicilium & priori renunciâsse. arg. L. nihil 31. ff. de Capt. & postlim. re-vers. jun. L. assumptio 6. §. 2. ff. ad municipalem. L. 2. C. ubi Senator. L. prædia 28. §. 1. ff. de fund. instr. L. 203. ff. de V. S. Quarta, si assiduè hic habitet. Assiduè habitasse dicuntur alicubi, qui habitavit per decennium. Bald. Alexand. Panor. Host. Ruin. apud Menoch. l. c. n. 15. Mascard. vol. 2. de probat. concl. 535. Wesenbec. in parat. ff. ad municipal. n. 7. Ummius de Foro comp. thes. 1. n. 6. Poterit tamen minori temporis lapsu argui constitutum esse domicilium, si aliæ circumstantiae concurrant: sicut è contrario neque decennium semper sufficiet. Sic si alibi habens domicilium per decennium Studiorum causâ hic versetur, nemo censuerit domicilium constituuisse, nisi aliæ conjecturæ accesserint. Panorin. in C. ult. de Paroch. n. 8. Mar. Socin. in c. ult. de Foro comp. col. 9. Felin. in C. dilectus 2. de Rescrip. Paris. L. 3. conf. 12. n. 17. Quinta, si jus Civitatis alicubi impetravit, ibique habitare cœpit. Alciat. in L. pupillus. §. incola. ff. de V. S. Decian. consil. 283. n. 11. Mascard. l. c. n. 4. Habitacionem præter jus Civitatis esse necessariam ad constituendum domicilium patet ex eo, quod civis quis esse potest, quin sit incola & domicilium habeat. L. cives 7. C. de incolis, L. municipem,

L

&amp;

& L. ejus 27. §. 2. ff. ad municipalem. Sextam conjecturam addit Zangerus l. c. n. 55. de Clerico habente Beneficium residentiam requirens, & septimam n. 56. de muliere nupta. Verum hic conjecturis opus non est, cum certum sit, Clericum sortiri domicilium, ubi habet Beneficium residentiam exigens, & mulierem per nuptias acquirere domicilium mariti, ut mox dicetur.

101. Quinto dubitatur, an domicilium haberi quandoque possit absque habitatione. Affirmative respondendum est de ijs, qui ratione conditionis & statutis alicubi stabiliter manere tenentur: uti est Senator L. filij 22. §. pen. ff. ad municip. Miles L. municeps 23. §. 1. ff. eod. Relegatus in perpetuum aut longum tempus. cit. L. 22. §. 3. secus, si ad breve tempus relegatus sit. L. ejus qui 27. §. 3. ff. eod. Religiosi certo Conventui ac Monasterio addicti. Clerici habentes Beneficium, quod residentiam exigit. Quin etsi residentiam Beneficium non requirat; nihilominus ratione illius sortiuntur forum quoad Ordines suscipiendos. C. cum nullus de temp. ordin. in 6. & Gloss. ac DD. ibi: nec non quoad ea, quæ ipsum Beneficium concernunt. Can. omnes basilicæ 16. q. 7. C. cum conquerente de Offic. Ordin. C. cum capella de privil. 6 C. 1. §. in eos. eodem in 6. Panor. in C. postulasti de Foro comp. n. 4. Covarr. pract. c. 11. n. 5. Oliva p. 3. For. Eccl. q. 17. n. 11. 6 12. Pax Jordan. vol. 3. L. 13. tit. 8. n. 241. Aliud exemplum est de uxore: hæc enim domicilium & forum mariti sortitur, ubi cuncte ipsa habitet. Idque etiam defuncto viro retinet, quamdiu in viduitate permanserit. L. fin. C. de Incolis. L. fin. §. 3. ff. ad munic. L. 1. §. 2. ff. de liber. agnosc. L. mulierem 5. ff. de R.V.L. 1. C. de Mulier. Et quidem sortitur hoc forum quoad omnia. Bald. Cyn. ac alij in cit. L. fin. fitque civis ejus urbis, cuius est vir. Bart. in cit. L. fin. Gloss. Angel. Joan. de Plateis in L. cives C. de Incolis. Bald. L. f. consil. 139. Tiraq. L. 1. connub. à n. 29. Adducent tamen Bart. l. c. Sperelli p. 2. decis. 157. n. 6. ac alij, quod forum propriæ originis retineat in ijs, per quæ à viri obsequijs non retrahitur.

102. Sextum denique dubium est , quomodo domicilium amittatur. Dicendum est , domicilium , sicut regulariter non acquiritur solo vel animo habitandi vel habitatione , sed utroque , ita non amitti solo animo illud mutandi , aut solo discessu , sed opus esse animo mutandi & actuali mutatione. *L. domicilium* 20. ff. ad municipalem , juncta Gloss. *V. domicilium*. *L. origine* 4. *C. de municip.* Bald. in *L. ult.* *C. eod.* Marian. Socin. in *C. licet de Foro comp.* n. 54. Quando Bart. in *L. de jure* 37. ff. ad *municip.* n. 2. ait , domicilium habitationis , quod nuda voluntate constituitur , posse nuda voluntate transferri , dicere censendus non est , quod nuda voluntas sufficiat ad domicilium vel constituendum vel mutandum , sed quod domicilium pro arbitrio constitutum pro arbitrio mutari possit : alias contradiceret ijs , quæ asseruerat in *L. placet.* ff. *cod.* n. 1. Hinc audiendus non est Petr. Barbosa in *L. heres.* §. fin. n. 70. ff. *de judic.* asserens , simplici voluntate domicilium extingui , malisque præter Bart. allegans Menoch. *L. 6.* *præsumpt.* 42. & Gaill. *L. 2. obs.* 36. malè pariter citans *C. pen.* *de Foro comp.* *L. cùm quædam* 19. ff. *de jurisd.* & *L. libertus* 17. §. 11. ff. ad *municipalem.* Cæterum ex eo , quod quis è loco recessit cum rebus suis , præsumitur recessisse animo mutandi domicilium. Bart. in *L. assumptio* §. ult. ff. *cod.* & in *L. prædia* §. 1. ff. *de fundo instruçto.* Bald. in *rubr.* *C. si à non comp. jud.* Socin. *I. c. n. 25.* & 54. Alex. *L. 5. conf.* 34. n. 4. Paris. *L. 3. conf.* 12. n. 13. & *conf.* 34. n. 20. Menoch. *I. c. n. 14.* nisi conjectura alia obstat , v. g. quod tantum hostis aut pestis fugienda vel negotiorum causâ discesserit : præcipue si domum hic habet , quam ante suum discessum non vendidit , aut vendere cogitavit.

### §. II.

#### *An per domicilium habitationis Forum*

*contrahatur.*

#### S U M M A R I U M.

L 2

103.

103. Forum Domicilij fortius & universalius est quovis alio Foro.  
 104. Conveniri ibi subditus potest etiam absens, & propter contractum vel delictum alibi commissum.

105. Domicilium Servi, Liberti, Uxoris, & Heredis non defumitur à propria ipsorum habitatione.

106. Habens plura domicilia utrobique conveniri potest.

107. Contra subditum alibi delinquentem Iudex domicilij procedere potest etiam per inquisitionem.

108. Potest, qui duo habet domicilia, in alterutro, quo maluerit, Sacra menta suscipere & matrimonium contrahere.

103. Forum quemque sortiri, ubi habet domicilium, adeò certum est, ut soli illi, qui domicilium alicubi habent & incolae sunt, propriè ac simpliciter sint subditi, ut suprà dixi. Estque Forum Domicilij generale, séque ad universam jurisdictionem contentiosam & voluntariam extendens, &c, ut loquitur Bald. in rubr. C. si à non comp. jud. præcipua jurisdictionis causa, fortiusque omni alio foro & potentius. Cagnol. in L. exigere dotem ff. de judic. n. 9. Petr. Barbosa in L. 19. §. ult. ff. eod. n. 34. cum communi DD. & concurrit cum alijs foris, ut supponitur cit. L. 19. §. 1. & 4. ac L. 2. C. de jurisdic. excepto foro Feudi, quando dominus feudi non est simul Iudex domicilij; & foro rei sitæ, ut infrà dicetur n. 216.

104. Hinc in loco domicilij conveniri quisque potest tam civiliter, quam criminaliter, etiam ratione contractū alibi celebrati, & delicti alibi commissi. cit. L. 19. §. ult. C. dilecti de Foro comp. Panor. in C. fin. eod. n. 38. & Felin. n. 23. Butr. n. 16. Socin. n. 8. & 45. Castr. in L. 2. §. legatis ff. de judic. Covarr. præcl. c. 11. n. 6. Et quidem etiam de ijs, quæ gessit ante domicilium & forum hic obtentum. cit. L. 19. §. 1. & ult. L. pen. ff. de Iurisd. L. ult. C. de Incol. Panor. cit. n. 38. & 39. Surd. consil. 313. n. 66. Poteritque etiam absens citari, & non comparens in contumacia constituitur, ut non tantum immissio in ejus bona fieri possit (quod est commune etiam Foro rei sitæ & delicti, ut infrà dice-

dicitur) sed poenis etiam & censuris compelli, ut se sistat, ac in causis, ubi litis contestatio non requiritur, procedi potest ad sententiam & executionem realem. *L. 4. §. prætor. ff. de damno inf. C. causam de dolo & contum.* Gloss. ibi. *V. ad domum*, Alex. ac alij in *L. cùm quædam. ff. de Iurisd.* cùm Judex domicilij retineat in subditum jurisdictionem, quocunque ille loco existat, & subditus semper maneat subditus, ubicumque est. Gaill. *L. 2. obs. 36. n. 12.* Gilhausen *arbor. judic. c. 1. p. 2. §. 2. n. 14.* Ummius *l. c.*

105. Aliquæ à regula modò tradita personæ excipiendæ sunt, in quibus convenientis non ipsarum, sed aliorum domiciliū spectatur. Primo enim servus convenientus est coram sui domini Judice. *L. 1. C. ubi de cauf. stat.* Secundo libertus ejusque filij coram Judice domicilij patroni. *C. 22. ff. ad municip.* Decian. *tract. crim. L. 4. c. 8. n. 1.* Umm. *process. judic. disp. 4. th. 1. n. 6.* Tertio uxor & vidua in loco domicilij maritalis. *cit. L. 22. §. 1. L. pen. pr. ff. de Iurisd.* *L. ult. C. de jur. liber.* ubi cunque ipsa habet. Deciau. *l. c. à n. 2.* Gilhausen *l. c. n. 10.* Zanger. *de except. p. 2. c. 1. n. 56.* Aliud obtinet in sponsa de futuro: hæc enim non coram sponsi, sed suo Judice convenientia est. Decian. *cit. L. 4. c. 9. n. 54.* Umm. *l. c.* Quartò hæres ibi convenientur & defenditur, ubi defunctus conveniri & defendi debuit, adeò ut nullo suo privilegio, nullaque fori præscriptione illud forum declinare possit. *cit. L. 19. prin. ff. de Iudic.* ibi: *hæres ibi defendendus est, ubi defunctus debuit, & convenientus, si ibi inveniatur, nulloque suo privilegio defendatur*, id est, defendantor. Quæ verba magnam inter interpretes discordiam pepererunt, quod posteriora prioribus contradicere videantur, nam dicitur primò *hæres & absens defendendus*, ac postea dicitur *conveniendus, si ibi inveniatur*, id est, si præsens sit. Respondent Petr. Barbosa *ibi n. 12.* & Oliva *3. p. Fori Eccl. q. 24. n. 4.* secuti Bart. in *L. fideicommissum. ff. eod.* Baldum in *L. 2. ff. de Iurejur. col. 25.* Aretin. in *C. quia de Iudic. n. 4.* Anchar. *conf. 244. n. 4.* sensum legis

legis alium non esse , quām quōd hāres in loco , ubi defunctus conveniendus erat , respondere debeat , sive absens sive præsens ibi sit. Verūm huic expositioni obstatre videntur verba *si ibi inveniatur*. Castr. in cit. L. 19. §. 1. n. 2. Angel. ac alijs existimant constitui discrimen inter defunctum & haeredem , ita ut licet ille in loco sui domicilij conveniri potuisset etiam absens , conveniri tamen ibi nequeat hāres , nisi ibi præsens. Quam tamen explicationem ægrè admittunt verba *hāres* & *absens*. Communior responsio est , conveniri in domicilio defuncti posse haeredem etiam absentem à loco illius domicilij , si litem defunctus jam contestatus aut saltē citatus fuit , juxta L. *si is* 34. ff. eod. secūs , conveniri tantū posse , si ibidem præsens est. Sed non vacat hanc litem facere nostram. Illud receptum est , legem loqui de illis tantū obligationibus , prōpter quas defunctus , si vive-ret , conveniri posset ; non vero de illis , quæ ab ipso in haer- dem non transierunt. Unde inferunt , non posse istum conveniri pro legatis & fideicommissis in domicilio defuncti , tametsi ibi reperiatur : posse tamen conveniri in loco , ubi major pars hæreditatis existit. L. *si fideicommissum* 50. ff. de judic. Tiraq. L. 1. retract. §. 36. Gloss. 3. n. 6. Molin. L. 3. de primogen. c. 13. n. 37. Gomez. tom. 1. c. 12. n. ult. Barbosa l. c. n. 34. & 49. Ut-rūm verò illa verba *nulloque suo privilegio defendatur* , intelligenda sint dūntaxat de privilegio & favore privato , an verò etiam de communi , v. g. num Clericus successor Laici coram defuncti competente Judice Laico conveniri possit , commodius infrā , quando sermo erit de Foro competente Clericorum , de-cidemus. Cæterūm si ipse hāres agit , petitionem hæreditatis facere debet , ubi res hæreditariæ tempore decedentis testatoris extiterunt. tot. tit. C. ubi de hāred. agi oport. etiam alibi depositæ. L. 1. §. 37. ff. depositi. nisi eo fine depositæ & destinatæ fuerint , ut ibi perpetuū manerent. L. ex facto §. rerum ff. de hāred. insit. Bartol. & DD. ibi. Quinto illi , qui sunt de familia sive Clerici sive Laici , domicilium & forum ex persona patrisfamilias con-sequun-

sequuntur. Umm. l. c. in fine Et speciatim de familia Clericorum Decian. cit. c. 9. à n. 47. Farin. q. 8. n. 26. Tertacinq. l. 2. resolut. tr. de Foro comp. Sed non absolute & sine discrimine verum est, quod familia Clerici habeat forum Eccl. quod ipse Clericus, ut infra de Foro compet. Clericorum dicetur. Sextam exceptionem facit Ummius l.c. defensorem ibi comparere deberet, ubi ipse principalis se defendere necessum habet. L. 139. ff. de V. O. & L. 49. ff. de judic. Verum haec non est exceptio: cum principalis, non defensor, conveniatur, & sic necessariò defensio fieri debeat, ubi stare judicio deberet principalis, si praesens esse vellet au posset.

106. Ex dictis consequens est I. quod reus conveniri possit in loco domiciliij etiam ratione contractus alibi initi & delicti alibi patrati: dummodo alibi non fuerit praeventus. C. fin. de Foro comp. L. consensisse 2. §. 3. L. hæres 19. §. 2. & ult. ff. de judic. L. 2. & 5. pr. C. de jurisd. om. jud. L. ult. C. ubi in rem actio. L. 3. C. ubi cause statut. Panorm. in C. ult. de Foro comp. n. 41. asserens esse communem, Clar. L. 5. sent. §. fin. q. 39. n. 3. Eadem est ratio de casu, quo quis plura habet domicilia: potest enim in singulis conveniri cum jure praeventonis. Et quidem juxta arbitrium actoris vel accusatoris vel in hoc vel in illo. C. ex parte 15. de Foro comp. Panor. in C. dilectus de rescrisp. n. 6. Ant, Butrio n. 18. Felia. n. 10. Ratio est, quod Judex utriusque domiciliij, & Judex æquè domiciliij, ac contractus vel delicti, est competens; quivis autem conveniri potest coram Judice suo competente.

107. Quod modò dixi, Judicem domiciliij contra subditum procedere posse propter delictum etiam alibi patratum, receptum est ab omnibus Interpp. teste Covarr. c. 11. præt. n. 6. §. his egnidem & §. quam ob rem, si accusator adsit. Receptum pariter eodem teste est, posse vi Juris Pontificij Judicem domiciliij procedere etiam per inquisitionem. C. ex parte, C. dilecti, C. cum contingat de Foro comp. C. cum nullus de tempor. ordin.

in 6.

*in 6.* An verò hoc possit etiam de Jure Civili , controversum est , multis negantibus , affirmantibus plurimis, quos congerunt Covarr. *l. c.* Farin. *de inquisit.* q. 7. n. 19. & 20. Mihi affirmativa videtur probabilior : tum quòd generalis consuetudo eam approbavit , uti testatur Clarus apud Farin. *cit.* n. 20. & Carpz. p. 3. *crim.* q. 110. n. 8. tum quòd *L. si quis* 10. C. *de Episc.* & Cler. seculari Judici potestas datur puniendi Laicos , qui in Ecclesijs delinquunt, tametsi istae sint extra ipsius territorium & jurisdictionem , nullo factō discriminē inter accusationem & inquisitionem : tum denique , quòd nec lex 2. §. 5 ff. *ad L. Iul. de Adult.* quæ pro negante sententia adducitur , aliquid probat , uti consideranti patebit ; nec ratio , quam adducunt , nimirum , quòd nulla injuria inferatur Reipublicæ & territorio per delictum alibi patratum. nam praeterquam quòd subditi etiam alibi delinquentes notam & probrum inurunt suæ Reipublicæ , coercendi sunt , ubi & quando sunt subditi , quales sunt , etiam dum alibi existunt , estque territorium expurgandum sceleratis , ne obtentā impunitate & ipsi prolabantur in deteriora , eadēmque domi , quæ alibi , perpetrent , ac concivium animos corrumpant. Accedit , quòd dicta ratio nimium probet , quia sequeretur , nec per viam accusationis procedi contra illos posse , quod tamen fieri posse ipsi adversarij affirmant.

108. Consequens est II. eum , qui duo habet domicilia , posse in alterutro , quo maluerit , suscipere Sacra menta & matrimonium inire. Patet ex C. *omnis de pœn.* & remiss. C. *cum inhibitio de cland. despōns.* Trident sess. 24. c. 1. de Reform. Matr. vi quorum quivis Sacra menta percipere potest ac tenetur à proprio suo parocho : est autem proprius parochus ille , ubi quis habet domicilium. Patet insuper ex C. 2. §. *cum ab eo de sepult.* in 6. ubi dicitur , si is , qui duplē parochiam habuit , in tertio quopiam loco sepulturam elegit , inter utramque ipsius parochiam dividendam esse canonicam portionem : nec dicitur solvendam illi soli , in qua defunctus tempore mortis habitavit. Similiter ergo Sacra menta in diffe-

differenter recipi in utraque possunt, cùm Sacramentorum recep-  
tio æquè sit inter jura parochialia, ac canonica portio. Et ita cum  
Franco aliisque docent Navarr. in C. placuit de Pænit. dist. 6. n. 78.  
Henriq. de Pæn. L. 6. c. 7. n. 2. Sanch. L. 3. de Matr. disp. 24. n.  
J. Bonacin. de Pæn. disp. 5. q. 7. pun. 2. prop. 2. Suar. eod. disp. 25.  
sect. 2. n. 5. Oliva de Foro Eccl. p. 3. q. 18. n. 45. contra Paludan.  
Silvest. Tabien. Angel. Rosell. ac alios, qui tenent, ibi solum sus-  
cipi ea posse, ubi suscepturus tunc temporis habitat.

## §. III.

*An per quasi domicilium Forum  
acquiratur.*

## S U M M A R I U M .

- 109. Status quæstionis proponitur.
- 110. Habens quasi domicilium Sacra menta , exceptis Ordinibus , suscipere potest.
- 111. Ac dispensationem in Votis , & juramentis impetrare ; habere sepulturam ; & jungi matrimonio.
- 112. Tenetur Statutis & Consuetudinibus loci.
- 113. Tametsi animum habeat solum per aliquot menses habitandi.
- 114. Excipitur Princeps.
- 115. In loco quasi domiciliij nemo conveniri potest propter delicta alibi patrata , aut initos alibi contractus.
- 116. Respondetur ad opposita.

109. Quasi domicilium habere dicuntur, qui diu & per ma-  
jorem vel magnam anni partem alicubi commorandi animum  
habent, non tamen stabiliter & perpetuò, uti Studiosi in Acade-  
mijs, famuli, negotiorum gestores, milites præsidarij &c. An  
isti in loco quasi domiciliij forum fortiantur æquè ac illi, qui ha-  
bent domicilium, gravis & parùm explicatè à DD. agitata, mul-  
to minus decisa quæstio est. Secerni hic oportet Jurisdictionem  
Contentiosam à Voluntaria.

110. Quoad Voluntariam sacram convenit inter Interpp.

M

primò

primò , non posse Ordines Ecclesiasticos conferri ab Episcopo quasi domicilij , sed adeundum esse Episcopum Domiciliij aut Beneficij , aut Originis : sic enim traditur C. cùm nullus 3. de Temp. Ordin. in 6. & patet ex Trident. sess. 23. c. 9. de refor. ubi nec Episcopo suum familiarem non subditum ordinare permittitur , nisi per triennium secum fuerit commoratus , & beneficium , quacunque fraude cessante , statim reipsâ illi conferat . Cùm igitur suos duntaxat familiares , seu qui de ipsius familia sunt , & quidem sub dictis solum conditionibus ordinare possit , consequens est , quod non possit reliquos , qui in ipsius Dioecesi solum habent quasi domicilium . Convenit secundò , estque ferè ab omnibus receputum , habenti quasi domicilium posse ministrari Sacra menta necessaria , qualia sunt Poenitentiæ & S. Evcharistiae : quibus communiter addunt Confirmationem & Extremam Unctionem . Et quamvis Navarr. in C. placuit 3. de Pœnit. dist. 6. notab. 4. n. 85. existimet , hoctantum fieri posse ex licentia expressa vel tacita parochi domiciliij , Glossa tamen in Clem. I. de privil. communiter recepta , Panorm. in C. omnis de pœn. & remiss. n. 23. Innoc. ac alij , negant ullâ licentiâ opus esse . Neque admittendum videtur , quod non pauci asserunt , id locum non habere , quando parochia domiciliij facile adiri potest : nam praxi universalis contrarium observatur , teste Oliva p. 3. For. Eccl. q. 17. n. 45.

III. Potissimum igitur queritur de Matrimonio , Dispensatione in Votis & Juramentis , ac Sepultura . Quoad ista acquireti forum per quasi domicilium negant complures , quos accumulat Sanchez lib. 3. de matr. disp. 23. n. 11. & Oliva l.c. n. 46. Placet affirmativa , quam tenent Sanch. l.c. n. 12. ubi multis eam firmat rationibus , Lessius lib. 4. de Iust. c. 2. n. 47. ubi eam teneri ait à plerisque R. R. & usu confirmari , Delbene de Immun. Eccl. c. 11. dub. 1. sect. 1. n. 13. qui pariter de usu testatur , Laym. lib. 5. Th. mor. tr. 6. c. 10. n. 5. post Glossam in Clem. I. de privil. Panor. Palud. Gabr. ac alios . Hinc immerito pro ea solum civitat Sanchezium Olival. c. cuius rationes solvere debuit , antequam eam

eam diceret vix probabilem. Temerè quoque dicit, temerè dictum esse, quòd parochus proprius, quem Trident. *sess. 24. c. 1.* de refor. *Matr.* ad matrimonium requirit, non sit tantùm parochus domicilij, sed etiam quasi domicilij: nam pariter *C. omnis utriusque. de Pœn.* & remiss. requiritur proprius parochus ad Sacramentum Poenit. & tamen hic juxta ipsum etiam Oliva est etiam parochus quasi domicilij. Ex quo proinde (ut alias rationes omittamus) satis probatur posterior sententia: si enim parochus quasi domicilij est proprius quoad Poenitentiam & Evcharistiam, non est ratio, cur non etiam sit quoad Matrimonium & reliqua: excepto Sacramento Ordinis, ad quod recipiendum, ut dixi, requiritur Dicecesis domicilij *cit. C. 3. de temp. Ordin. in 6.* ubi cùm additur *in hoc casu* requiri domicilium, satis indicatur, in alijs casibus non requiri, sed sufficere quasi domicilium. An idem dicendum sit de alijs actibus ad jurisdictionem voluntariam pertinentibus, quales sunt Adoptio, Manumissio, Emancipatio, Legitimatio, Insinuatio donationis, Testamenti factio apud acta, Approbatio contractus, Privilegiorum concessio & confirmatio, ac similes, nimis longum foret intra harum paginarum angustias examinare.

112. Major contentio inter DD. est de Jurisdictione Contentiosa, an videlicet huic subiectat quasi domicilium. Dubitatur in primis, an peregrini, seu iij, qui alibi domicilium habent, hujus loci, ubi per magnam anni partem habitant, Statutis ac Consuetudinibus sint subjecti. Negant Gloss. *in C. quæ contra dist. 8. V. aut peregrini*, Specul. rubr. de Constit. n. 7. Archidiac. *in C. illa. dist. 12. V. serva*, Joseph. Angles *in 4. q. 4. de jejunio ante dub. 1. diffic. 2.* Pasqual. *de jejun. decis. 203. n. 3.* ac alij apud Sanch. lib. 3. de matr. disp. 18. n. 8. Fagundez. *in præc. Eccl. tr. 1. lib. 1. c. 8. n. 1.* & Delbene *l. c. sect. 3. n. 10.* Verum, ut longè communior, ita multò probabilior est sententia affirmans. Cùm enim hujusmodi peregrini, qui hic quasi domicilium constituerunt, absolutè fortiantur forum quoad voluntariam jurisdictionem,

ut modò dixi , consequens est , quòd etiam sortiantur quoad subjectionem & obligationem servandi leges , cùm hæc obligatio non tantùm respiciat bonum privatum singulorum , uti jurisdic-  
tio voluntaria , sed etiam publicum , ne alias ordo , quies , & partium consonantia tollatur . Videturque per se absurdum dicere , quòd Studiosi & famuli in alia Diecesi domicilium habentes hic non teneantur jejunare aut Missam audire , quando h̄c est dies fe-  
stus aut jejuniū , non item in sua patria : tametsi h̄c per annos com-  
plures habitent & magnam populi partem faciant . Certè com-  
muni sensu ac rectæ gubernationi est contrarium , ut bene ob-  
servat Suar. L. 2. de Festis c. 14. n. 2. qui propterea priorem opi-  
nionem negat esse practicè probabilem . Videri potest Tiraq. de  
*Retraçtu lignag. Gloss. 2.n. 26. & Panor. in C. quod Clericis de Fo-*  
*ro comp. n. 5. ubi ex Jure & DD. latè firmant , diu commorantes*  
*in aliquo loco verè esse incolas , ac forum sortiri .*

113. Ex hac doctrina communiter deducunt , quòd sicut ad forum ratione domicilijs sortiendum necessaria non est longi tem-  
poris habitatio , sed sufficit , ut quis locum adeat animo ibi stabili-  
ter habitandi : ita pariter sufficiat aliquò accedere animo diu ibi per-  
manendi , ita ut qui hoc animo accessit , loci legibus statim fiat  
subjectus , absque eo , ut diu ibi moretur . Dubium verò est , ad  
quantum tempus hoc manendi propositum se extendere debeat ,  
ad hoc , ut quis non hospes , sed habitator & incola censeatur . Sil-  
vest. V. *domicilium n. 2. Sanch. l. c.n. 9.* aliique existimant , opus ef-  
se , ut majore anni parte habitare velit . Sed conformior juribus  
videtur doctrina Navarri tr. de Lubilao. not. 32.n. 42. Suar. l. c.n. 6.  
Laym. L. 1. Th. mor. tr. 4.c. 14.n. 1. ac aliorum , sufficere propo-  
situm habitandi per aliquot menses , præcipue si domus , conclau-  
se , taberna &c. fuerunt conducta . arg. L. 19. §. proinde ff. de judic.

114. Excipiendus tamen h̄c est cum Tiraq. de utroque retr.  
L. 1. Gloss. 1. §. 3. n. 38. Suar. L. 3. de Leg. c. 35. n. 14. ac alijs , Prin-  
ceps : hic enim non obligatur Statutis municipalibus locorum ,  
ac provinciarum , tametsi longo ibi tempore resideat . Quia hu-  
jusmodi

jusmodi Statuta sc̄ere ab inferiore potestate condita sunt, ac idcirco vim obligandi Principem Superiorem non habent. Quā de causā Canonistæ afferunt, Legatum Pontificium non ligari legibus Episcoporum. Neque refert, hujusmodi leges à Principe confirmatas fuisse: censetur enim solum approbare pro loco determinato ejusque subditis; non pro tota Republica, cuius ipse caput est: nisi in eodem stabilem sedem habeat.

115. Alterum dubium est, an per quasi domicilium forum ita acquiratur, ut ibi conveniri quis possit etiam de contractibus alibi celebratis, & de delictis alibi commissis. Negant Hostiensis in C. quod clericis 9. de Foro comp. Bartol. in L. 19. ff. de Iudic. aliquae communiter. Distinguunt Alex. vol. 6. consil. 216. n. 14. & Farin. L. 1. de Inquis. tit. 1. q. 7. n. 5. sublim. 2. aiūntque, puniri in loco quasi domicilij posse, qui alibi deliquit tempore hujus domicilij jam contracti, e. g. si quis, dum est in famulatu aut in studijs hic Ingolstadij, delinquat Neoburgi; secūs, si ante constitutum hic quasi domicilium alibi deliquit. Affirmat simpliciter Panor. in cit. c. 9. n. 5. allegans Bart. Innoc. Joan. Andr. & Archid. sequiturque Laymanus in C. ult. de Foro comp. n. 19. Mihi attento Jure scripto & seclusa consuetudine verior videtur prima sententia: cūm postrema Panormitanū nullum inter domicilium & quasi domicilium discrimen constituat, & hujus forum æquè latè extendat, ac illius, contra L. h̄eres 19. §. ult. ff. de judic. C. delicti 17. & C. ult. de Foro comp. C. 1. eod. in 6. L. juris 2. C. de jurisd. ubi soli domicilio hæc fori universalitas & concurrentia cum alijs foris tribuitur. Frustrā profecto à Legibus ad constitendum domicilium & forum in illo sortiendum requereretur (uti requiri dixi suprà n. 94.) simul cū habitatione animus stabiliter habitandi, si quasi domicilium idomine operaretur, quod operatur domicilium.

116. Non obstant Jura, quæ pro se adducit Panor. Non quidem L. 2. C. ubi Senatores: quia ibi sermo est de domicilio. Non L. quisquis 16. C. si certum pet. nec L. sciens 3. C. ubi de crim. agi oport. quia ibi quoque agitur de loco domicilij, aut de eo, ubi

M 3

deli-

delictum est patratum. Non denique C. ex parte 15. de Foro comp. quia ibi solum asseritur, quod actio realis intentari possit in loco rei sitae.

## §. IV.

*An per domicilium Originis acquiratur  
Forum.*

## S U M M A R I U M.

- 117. Originem quisque habet in domicilio patris, quandoque avi, quandoque matris.
- 118. Non ibi, ubi natus est solum in transitu.
- 119. Proponitur opinio asserentium, quenvis in loco originis conveniri posse.
- 120. Opinio negantium.
- 121. Hanc firmat Consuetudo.
- 122. Licitum regulariter est mutare domicilium.
- 123. Respondetur ad oppositam.
- 124. In loco Originis suscipi Ordines Ecclesiastici possunt.

117. Originem quivis habere dicitur non solum ibi, ubi ipse, sed etiam, ubi legitimus ejus pater natus est: cum filius non tantum suam, sed & partis originem sequatur. *L. assumptio 6. ff. ad municipalem. §. 1. L. filios 3. C. de Municip. §. origin.* Imo non tantum patris, sed etiam avi *L. Libertus 17. §. 9. ff. ad municip. & ibi Bald. n. 4. Bart. in cit. L. 3. n. 2.* dummodo vivente avo conceptus fuerit. *Felin. in C. postulasti de Foro comp. n. 1. Alex. lib. 5. conf. 16. n. 9. Cyn. in L. 2. de jurisd. Mascard. de probat. concl. 1147. à. 12. Petr. Barbosa. in L. 19. §. proinde de judic. n. 28.* Requirit tamen Bart. *in cit. L. 6. §. 1.* ut sit in potestate avi. Sed hoc reprobat Barbosa *L. c. n. 30.* eo quod juxta *cit. L. 17.* nepos sequatur originem avi naturalis, tametsi natus sit in adoptiva familia: quo casu certum est non nasci in potestate avi naturalis. *§. pen. Inst. quib. mod. jus patr. potest. sol.* Non tamen sortimur originem anteriorum ascendentium. *Gloss. in cit. L. 6. V. non domicilium, &*

*in cit. L. 3. Bart. in cit. L. 6. §. Filius n. 1. Boér. decis. 13. n. 7. & 8.*  
 cum comm. ne scilicet progressus fiat in infinitum, & forum ha-  
 bere dicamur in agro Damasceno , ex quo communis omnium  
 nostrum parens eductus fuit , ac in maxima orbis parte, quam  
 successivè nostri maiores habitarunt. Neque filius legitimus se-  
 quitur originem matris. *cit. L. 3. C. de Municip. nisi quis ex capti-  
 vis parentibus natus patre in captivitate mortuo cum matre post-  
 liminiò reversus fuerit. L. 1. C. de postlim. revers. aut natus fue-  
 rit ex ancilla & ingenuo: nam tunc matris conditionem sequitur.  
*L. qui 12. C. se Murilegulis. L. Nati 29. C. de Decurion. L. ex in-*  
*genuo 4. C. de agric. & mancip. quemadmodum etiam ejus , qui*  
*justum patrem non habet, prima origo à matre, eoque die, quo*  
*ex ea editus est , numerari debet, ut inquit JC. L. 9. ff. ad municip.*  
 Idemque de vulgo quæsitis tradit Ulp. *L. 1. ff. eod,**

118. Quod verò dicitur, quemvis esse originarium ejus lo-  
 ci, ubi natus est, duntaxat procedit, si parentes ibi domicilium  
 habuerunt, dum ipse nasceretur: secùs, si tantum in transitu ma-  
 tris alicubi editus esset; nam tunc non hujus loci, sed ejus, ubi pa-  
 rentes domicilium habebant, originarius censebitur. *Bart. in cit.*  
*L. 3. C. de Munic. & orig. Panor. in C. Rudolphus 34. de rescrip. n.*  
*9. & Felin. n. 13. Boér. decis. 13. n. 52. Dec. in L. 19. §. proinde. ff.*  
*dejudic. Bald. Angel. & Albert. in L. hujusmodi 84. §. legatum. ff.*  
*de Legat. 1. Diaz in prax. crim. c. 54. n. 27. Navarr. conf. 41. n. 2.*  
*& 3. de præb. Barbosa de potest. Episc. alleg. 4. n. 18. Mascard. l. c. n.*  
*5. Sumitur ex cit. L. 84. §. 10. de legat. 1. Contrarium tenent, & ab-  
 solutè originarium quemvis censeri ibi, ubi etiam in transitu na-  
 tus est , tradunt Imol. Cuman. Alex. & Paul. Castr. ac alij apud  
 Mascard. l. c. n. 6. & Oliva p. 3. For. Eccl. q. 21. n. 5. Has opinio-  
 nes conciliat Petr. Barbosa l. c. n. 18. dicendo , primam habere  
 locum, quando proles nata est in itinere, quo parentes redibant  
 ad domicilium , à quo ad tempus absfuerunt v. g. negotiationis  
 causâ. Secundam verò tenendam, quando priore domicilio om-  
 nino deserto aliò migrabant , & proles nata est in itinere ad no-*

vum

vum domicilium. Aliam conciliationem molitur Mascard. l. 6. n. 7. cum Ripa, Riminaldo, ac Rebuffo, asserens, primam esse veram, si proles concepta fuit in loco domicilij parentum, & nata tantum in itinere, ac loco, ubi parentes non statuerunt domicilium: secundam verò procedere, si proles & concepta & nata fuit in itinere; tunc enim ejus tantum loci, ubi concepta & nata est, habendam esse rationem, non domicilij parentum. Mihi conciliatio prima verum continere videtur; secunda quoque quoad primam ejus partem; quoad alteram meritò dubitatur propter L. 1. C. de postlim. reversis, juxta quam proles ex duobus captivis nata, originem patris sequitur, si parentes ad domicilium postliminiò rediissent, tametsi alibi in captivitate concepta & nata fuerit, ut indicant verba: *quæ capta non est.* Addi casus alias potest, quem DD. non exprimunt, quando videlicet proles concepta fuit in uno loco, ubi parentes domicilium habebant, ac postea nata est in alio, ubi illi novum domicilium constituerunt: & tunc posterior locus non tantum domicilij, sed etiam originis censendus videtur, cum jura maximè considerent nativitatem. L. 1. prin. ff. ad municip. & L. Civis C. de incolis. Neque obstat, quod conceptus pro nato habetur L. qui in utero 7. ff. de statu hom. hoc enim solùm verum est, quando de commodis ipsius partus queritur, ut Paulus ibi dicit: originem autem sortiri odiosum quæ ac favorable est, saltem si origo dat forum.

119. Sed quæstio jam est, utrum origo det forum, seu, utrum in loco originis, æquè ac in loco domicilij, conveniri quis possit, tam in criminalibus, quam in civilibus, tametsi domicilium habitationis alio transtulerit. Affirmant Bart. in L. adsumptio 6. §. 1. ff. ad municip. n. 2. Panor. in C. fin. de paroch. n. 6. Felin. in C. fin. de For. comp. n. 24 Dec. in L. cum quædam puella. ff. de juris d. n. 5. Diaz in prax. crim. c. 8. Petr. Barbosa in L. 19. §. proinde. ff. de Iudic. n. 35. ubi ait, hoc esse receptissimum. Receptum quoque dicit Matth. de Afflct. decis. 384. n. 2. Afferunt C. pen. de Temp. Ordin. in 6. L. Incola 29. jun. Gloss. ff. ad municip. L. 1. C. de Municip.

¶ *Origin. & L. 4. C. eod* ubi dicitur, manifestum esse, origine propriâ neminem posse suâ voluntate eximi. Idémque traditur *L. seqq.* Ex quo inferunt, quemvis gaudere honoribus loci originis, & non tantum ad tutelam cogi ibi posse (quod solùm concedit *Gloss. in cit. L. 6. §. 1.*) sed etiam ad omnia alia onera, licet aliò domicilium transtulerit, *juxta L. 1. ¶ ult. C. de municip. ¶ Origin.* tradúntque ibi Bart. & Bald. idémque Bart. in *cit. L. 6.* *Ant. de Butrio in C. accedens 2. ut lite non contest. n. 21. Alex. vol. 2. conf. 157. n. 13. Panor. l. c. n. 6. Ruin. vol. 4. conf. 120. n. 5. Boér. decis. 13. n. 13. Menoch. confil. 1176. n. 6. ac alij.*

120. Negant conveniri quemquam posse in domicilio originis, si non ibi, sed alibi habeat domicilium habitationis, *cit. Gloss. in L. 6. ff. ad municip. V. domicilium*, & *Glossa in c. ult. de paroch. V. habitatores*, ibique Butrio *n. 6. Hostiens. tit. de Foro comp. §. quib. ex caus. V. item ratione*, Gemin. *in c. cùm nullus de temp. ordin. in 6. n. 10.* & Franc. *ibid. n. 3. Matth. de Afflict. l. c. Surd. conf. 313. n. 63. Decian. vol. 5. conf. 49. n. 15.* Stant pro hac opinione *cit. c. ult. vi cuius illi Christiani*, qui ex varijs Palæstinæ urbis domicilium transtulerunt Acconem seu Ptolomaïdem, hic tantum, & non ibi, unde discesserant, conveniri potuere. Et *c. ult. de Foro comp.* ubi inter modos sortiendi fori omittitur domicilium originis.

121. Verùm quidquid sit de Jure scripto, praxi & consuetudine universali receptum est, ut nemo in loco originis vel i-civilibus vel criminalibus conveniatur, si non concurrat domicilium habitationis. Idque non tantum in foro Ecclesiastico, sed etiam civili obtinet, uti testantur ex Lusitanis Barbosa *l. c. n. 35. & Oliva p. 3. For. Eccl. q. 21. n. 27* ex Italis Thesaurus *decis. Pedemont. 90. ad finem*, ex Germanis Gaillius *L. 2. obs. 36. n. 7* & Knipschildt *L. 2. de jurib. Civit. Imper. c. 20.* allegans Recesum Imp. August. anno 1555. §. wo aber unsere / & Aur. Bull. *c. 16.* Igitur originarius renuncians civitati & domicilium aliò transfrens, civis esse desinit, non solùm quoad jurisdictionem, verùm

N

etiam

etiam quoad munera , ac eo ipso , quòd mutat domicilium , perdit privilegia , & jura Civitatis. Bald. in L. 2. C. de *Infant.* expos. Jason in L. 2. §. *bujus.* ff. de *Iust.* & *Iur.* n. 15. Matth. de *Affict.* decif. 384. ubi illius , quod dicitur L. 4. C. de *Municip.* & orig. neminem sua voluntate posse eximi proprià origine , sensum esse ait , neminem , quamdiu in loco originis est , sua voluntate facere , ut civis non sit , séque loci muniberibus eximat : secùs , si locum illum omnino deserat , nunquam redditurus. Hinc verum non est , quod aiunt Barbosa l.c. n. 110. Menoch. L. 6. *præsumpt.* 42. n. 5. Matth. Stephani L. 1. de *jurisd.* c. 28. n. 58. & Zanger. de *Exception.* p. 2. c. 1. n. 68. amitti quidem domicilium originis quoad forum & jurisdictionem , non tamen quoad honores & munera , ac onera personalia. Tametsi enim Jure Civili id olim fuerit constitutum , consuetudine tamen abrogatum est. Nec apparet , quomodo ad onera personalia cogi possit , si desit ibi habere forum & jurisdictioni esse subjectus : item quomodo maneat civis quoad honores & munera , si deserendo domicilium originis perdit ejus commoda & privilegia , uti perdere fatetur cum communi DD. ipse Menoch. n. 6. & 7. Pariter non placet , quod tradit Zanger. n. 74. & Gaill. l. c. n. 11. in loco originis quemvis etiam post translatum inde domicilium , conveniri , si ibi inveniatur : nam DD. quos adducunt , loquuntur de Jure scripto , non consuetudinario. Hinc meritò de eorum assertione dubitant Stephani l. c. n. 77. Coler. de *Process. execut.* p. 2. c. 1. n. 17. & in c. Olim. de *Except.* Vult. in L. 2. C. de *jurisd.* n. 23. negat que bene Ummius ad *Process. judic.* disp. 4. th. 1. n. 6.

122. Ex eo porrò , quòd de consuetudine Germaniae cuivis licitum est , solum vertere , & civitatem mutare civitate , etiam dissentiente ac invito Magistratu , factum est , ut in multis locis alio migraturi teneantur solvere gabellas detractionis , einen Abzug / Nachsteuer / Ab- oder Nachschuß / de qua fuse Knipfchildt l.c. Wehner præc. obseru. V. Nachsteuer / Speidel. in Lex. jurid. V. Abzug / Ernest. Cothoman. resp. 19. Arumæus ad *Aur. Bull.* disc. 6. concl. 13. & Ru-

Rumelin. *ibid. p. 2. disert. 5. concl. 5.* An verò valeat Statutum, quo cives & originarij vetantur civitatem & domicilium mutare, controversum est inter DD. Affirmant Bart. in *L. ult. ff. de decret.* ab ord. faciend. Roman. *singul. 522. & consil. 59. col. 1.* Menoch. *consil. 1196. n. 1.* & seqq. Rumelin. *l. c. concl. 5.* Klock. *de Contribut. c. 7. n. 242.* Bodin. *de Republ. L. 1. c. 6.* Græven. *2. concl. 36.* *consil. 2. n. 6.* Negat Knipschildt *l. c. n. 4.* cum Besold. ac alijs, quos refert. Horum opinio & libertati naturali, quæ per hujusmodi Statutum nimis constringeretur, conformior videtur, & *legi 71. §. 2. ff. Condit & demonst.* ubi Papin. ait, *dici posse, si Titio centum relicta sunt, ita uti in illa civitate domicilium habeat, non esse locum cautioni, per quam jus libertatis infringitur.* Quæ ratio de non tollendo jure libertatis multò fortius pugnat contra statutum, quām contralegatum sub illo modo relictum: Statutum enim omnes, legatum paucos afficit, & per posterius non imponitur absoluta necessitas certo in loco figendi domicilium, sed tantum sub conditione, si velis habere legatum; absoluta verò per Statutum imponitur manendi in loco nativitatis, ac instar eorum, qui ad remigium damnati aut in insulam deportati sunt, inde pedem non efferendi. Libertas certè deserendi dioecesin competit Clericis (nisi Beneficio saltem curato adstricti sint) nec migrare volentibus negare Episcopus potest testimoniales literas, ut non semel Romæ decisum referunt Campanil. & Riccius apud Barbos. *de potest. Episc. alleg. 21. n. 6.*

123. Contrariam sententiam non satis evincunt leges, quas Menoch. *l. c. addensat.* Non quidem *L. ult. ff. de decretis ab ordin. fac.* quia ibi solum dicitur, non posse quemquam experiri extra collegium, in quo tractanda causa est. Non *L. 2. C. de Offic. Praef. urb.* ibi enim statuitur, non posse Praefectum urbis quasdam personas de provincia avocare in urbem, nisi tantummodo suos officiales, & populares almae urbis seditioni obnoxios, seu agitatores urbis (de quibus Cuiac. *ad cit. L. 2. & lib. 8. obser. 28.*) specialiter ratione muneris urbi adhuc obstrictos. Igitur revocare

non potest quoscumque alios urbis originarios. Non *L. 4. C. de municip. & origin.* ut patet ex dictis n. 121. & videri potest Brunemann. in *b. l. Christin. vol. 5. decif. 31. n. Gail. L. 2. obs. 36. n. 5. Sur. decis. 330. n. 5.* Non *L. ult. C. eod:* quia plus inde non probatur, quām quōd is, qui decurionatum aliudve munus in loco originis vel domiciliū iam suscepit, non possit ad illud evitandum pro arbitrio inde discedere. Et hoc ipso dum ibidem dicitur, eum, qui migraverit, duarum civitatum decurionatū onera sustinere, in una voluntatis (ubi sponte sibi domicilium elegit) in alia originis, supponi videtur, posse aliō discedere, modo onera utriusque civitatis sustinere velit: aliās si translatio domiciliū non valeret, in nova, quam elegit, civitate, permittendus non esset munus gerere. Non *L. 8. C. de Incolis.* quia ibi solum dicitur, manifestum esse, *originis ratione ac domiciliū voluntate ad munia civilia quemque vocari;* non verò, quōd discedere & mutare domicilium nequeat. Non denique *L. un. C. si curialis rel. civit.* ibi enim solum prohibetur Curialibus, *ne civitates fugiant aut deserant rus habitandi causā:* quia ratione officij certo collegio sunt adstricti. cit. *L. un. & L. 1. ff. de Decurion. ac L. 26. C. eod.* unde à sensu contrario colligitur, reliquis, qui civitati ratione officij, quod gerunt, speciali nexu adstricti non sunt, licitum esse migrare; *quia nihil est impedimento,* ut ait JC. *L. 31. ff. ad municip. quō minus quis, ubi velit, habeat domicilium, quod ei interdictum non sit;* quod quandoque interdici posse non negamus, videlicet si quis publicis muneribus destinatus nondum perfecto munere renunciare incolatui velit. *L. Incola 34. ff. eod.* aliisve peculiaribus de causis, quas refert Glossa *in cit. L. 31.*

124. In domicilio Originis non acquiri forum, saltem de consuetudine, nisi sit simul domicilium habitationis, hactenus dixi. Casus unicus excipiendus est quoad Ordines Ecclesiasticos: hos enim conferri posse ab Episcopo originis constat ex *C. cū nullus 3. de temp. ord. in 6. ibi: superior in hoc casu intelligitur Episcopus, de cuius Diœcesi est is, qui ad ordines promoveri desiderat,*

rat, oriundus &c. Ubi dum dicitur *in hoc casu*, videtur significari, hunc casum esse specialem & exceptum, & quoad alia forum non acquiri in loco originis. Glossa, Gemin. n. 10. Franc. n. 3. ac Oliva p. 3. For. Eccl. q. 21. n. 15. Sed neque Ordines conferri ibi possunt, ubi quis natus fuit tantum in itinere aut ubi parentes alibi domicilium habentes per breve duntaxat tempus commorati sunt. Colligitur ex L. Cives C. de Incolis, & docent Panor. in L. Rodulphus de Rescr. n. 9. Laym. L. 5. tr. 9. c. 9. n. 10. Barbos. de Offic. Episc. alleg. 4. n. 18. Henr. L. 10. c. 22. §. 1. Oliva l. c. n. 10. & sequitur ex dictis n. 118. Neque conferri possunt in loco originis tantum paternæ, sed solum propriæ, ut contra Barbosa l. c. n. 4. male quosdam pro se allegantem docent Joan. Andr. Gemin. Franc. Henr. II. cc. Graff. tit. de probat. decis. 15. Valasc. alleg. 5. n. 25. Quaranta in Bullar. V. Ordo, Oliva l. c. n. 25. patetque ex citatis verbis *de cuius Diœcesis est oriundus*, non pater.

## §. V.

*An in Domicilio Communi acquiratur Forum.*

## S U M M A R I U M.

125. *Roma olim commune erat domicilium Romano Imperio subditorum.*
126. *Non item bodie.*
127. *Nisi quoad causas Ecclesiasticas.*
128. *Commune domicilium est, ubi est Imperator.*
129. *Curia est, ubi Pontifex & Imperator, aut ejus Ministri & tribunal.*
130. *In loco domicilij communis solum convenit, qui ibi est præsens.*
131. *Nisi causæ sint graviores, aut eas ad se avocet Princeps.*
132. *In certis casibus datur ius revocandi causam à Foro communī ad particulare.*
133. *Explicatur, quinam hujusmodi casus sint.*
134. *Quandonam Legati ius habeant causam revocandi domum.*

N 3

135.

135. Revocanti statuitur terminus causam introducendi in Foro particulari, nec auditur post litem contestatam.

125. Roma, dicebat Tullius Cicero 2. de Lege Agr. contra Rullum, communis patria omnium nostrum, & Modestin. L. 33. ff. ad municip. Roma, inquit, communis nostra patria est. Idemque repetitur L. si duas 6. §. 11. ff. de Excus. tut. L. ult. ff. de Interdict. Et Relegat. Hinc subjecti Romano Imperio conveniri Roma poterant, propter originem & plenitudinem potestatis, licet ibi nec domicilium habuissent, nec contraxissent, nec delinquissent. L. Nec cum 28. §. 4. ff. Ex quib. caus. major. Bart. in cit. L. 33. Castr. in L. eum qui. §. 1. n. 3. de Constit. pecun. Alex. in L. si legatus. prin. ff. ad Trebell. Jason in L. 6. ff. de legib. n. 6. eò quod in Orbe Romano qui sunt, ex constitutione Imp. Antonini cives Romani effecti sunt, ut ait JC. L. 17. ff. de statu hom. & Justin. Novell. 78. c. 5.

126. Verum hoc non amplius obtinet, cum Roma modo non sit sedes Imperatoris, nec ejusdem jurisdictioni subjecta, sed SS. Pontificis, ut cum Catholicis DD. tenent Matth. Stephani L. 1. c. 28. de jurisd. n. 21. aliquie Heterodoxi. Nam quidquid sit de donatione urbis Romae à Constantino facta, quam hodie multi reiiciunt, excepto Palatio Lateranensi, certum est, quod Pipinus Rex Franciae, cum anno 755. in Italiam cum exercitu transgressus omnes Civitates Exarchatus Romani occupasset, eas donarit S. Petro & Ecclesiae Romanae, clavibus per Fulradum Abbatem S. Dionysij suum Sacellatum arae Divorum Petri & Pauli impositis una cum Donationis, quam sanctis hisce Apostolis fecerat, instrumento, suâ & filiorum, ac Optimatum manu subscripto. Eamque postea anno 774. ejus filius Carolus M. vieto Desiderio Rege Longobardorum, sanctae Sedi confirmavit juramento ac instrumento solemnia se & à Proceribus ac Episcopis subscripto, auxilique adiecta terrâ Sabinorum, Ducatu Spoleto & Beneventano, pluribusque alijs ditionibus. Eandem Pontifici Paschali Ludovicus Pius adiectis alijs possessionibus confirmavit

firmavit anno 817. cuius donationis literas ab ipso & tribus filijs, decem Episcopis, & quindecim Comitibus subscriptas recitat Baronius *ad eundem annum 817. n. 10.* Demum ratam eam habuit Carolus Calvus, addito Ducatu Capuæ, ac pluribus alijs Civitatibus, cedens Pontifici Joanni VIII. anno 876. absolutam & supremam potestatem in terris, quas Patrimonium S. Petri dicimus. Quin jam ante Pipinum Roma multæque aliaæ urbes sub dominio sacrae Sedis erant. Thomasin. p. 3. *Vet. & Novæ Eccl. Discip. L.* 1. c. 29. à n. 6. Baronius *I. c. & ad ann. 755. n. 27. ann. 774. n. 5.* Morerus in *Diction. Histor. V. Constantin le Grand.* §. lorsque l' Empereur, & §. seq. Afferunt quidem Gloss. 2. in *L. Cives C.* de *Incolis*, Bart. in *cit. L. Roma & L. Hostes.* ff. de *Captiv.* n. 6. Imola in *c. fin. de Foro comp.* n. 2. & Dec. in *c. Meminimus de Appell.* n. 5. etiam hodie Romanam dici patriam communem, & omnes Romano Imperio subditos dici Cives Romanos; tum quod Jus antiquum quoad hoc non inveniatur correctum; tum quod jurisdictione in SS. Pontifices cum omnibus suis privilegijs translata fuerit: ex quo consequens esse videtur, quod tradit Andr. Sicul. in *cit. c. ult.* n. 2. Romanam adhuc commune forum esse etiam quoad laicos. Meritò tamen id alij cum Anton. in *cit. C. fin.* n. 23. & Felin. n. 25. reiiciunt, tenentque, laicos Romæ in temporalibus & profanis causis conveniri non posse, nisi SS. Pontificis temporali jurisdictioni sint subjecti, uti sunt, qui in Patrimonio D. Petri degunt.

127. Illud certum est ex *C. fin. de Foro comp.* Romanam Ecclesiastiarum personarum communem etiam hodie patriam esse, cumque etiam laici in causis Ecclesiasticis forum Ecclesiæ sortiantur, etiam isti in dictis causis conveniri poterunt, ut observant Petr. Barbosa in *L. 2. §. Legatis ff. de judicijs n. 33.* Covarr. *præl. qq. c. 5. prin.* Oliva p. 3. *Fori Eccl. q. 25. n. 1.* & hoc teste omnes Interp. in *cit. C. ult.* Cæterum Roma hic non est materialiter accipienda & pro determinata urbe, quæ eo nomine appellatur, sed pro illo loco, ubi Pontifex residet, sive Roma is sit,

five

sive alius: ubicunque enim is resederit, ibi sedes & Curia Pontificia erit. *L. 1. §. sed et si C. de Vet. jure encl. Covarr. pract. qq. c. 4. n. 10. & seqq.* cum Innoc. Panor. Felin. Butr. Dec. Bald. Curt. Jun. Hinc cùm Clem. V. Joan. XXII. Benedict. XII. Clem. VI. & Innocent. VI. per annos amplius 70. residerent in Gallis (in Captivitate, ut loquuntur Itali, Babylonica, quòd totidem annis filij Israël Babylone captivi fuissent) conveniri ibi in causis Ecclesiasticis poterant fideles, æquè ac Romæ prius conveniri potuere.

128. Ex qvo ob paritatem rationis inferunt Bald. *in rubr. C. qui accus. non poss. u. 1. Dec. in C. Meminimus de prob. n. 12. Imola & Butrio in cit. C. ult. Barbosa l. c. n. 41.* cum Gloss. communiter recepta *in cit. L. Roma & in L. Nec non §. fin autem ff. ex quib. caus. major.* quemvis Romani Imperij subditum posse hodie conveniri ibi, ubi Imperator est: eò quòd commune domicilium est domicilium Imperij, cùm omnes, qui sub Imperio domicilium habent, subditi Imperij dicantur, & legibus ac constitutionibus Imperialibus subiçiantur. Gaill. *L. 2. obs. 36. n. 3. Matth. Stephani l. c. n. 22.* Nequedum Populus Romanus omnem potestatem transtulit in Imperatorem *L. 1. ff. de Conſtit. Princip.* eam urbi Romanæ prærogativam reservavit, ut ibi suprema Curia maneret.

129. Sed controversum adhuc est, ubinam Curia SS. Pontificis vel Imperatoris esse censeatur. In tres opiniones super hac quæstione abierunt DD. Primo Gloss. *in Extrav. Execrabilis de præb. V. Romanæ Curiæ* cum Innoc. Panor. Butr. & Franco tenet, ibi Curiam esse, ubi est Pontifex aut Imperator, tametsi ibi ejusdem Cancellaria & Consiliarij non sint. Secundò alij affirmant, ibi tantum Curiam esse, ubi supremum Principis tribunal ordinarium est, sive ibidem Princeps sit sive non. Ita Covarr. *l. c. Garcias p. 5. de Benef. c. 1. n. 388. Aug. Barbosa de Offic. Episc. alleg. 57. n. 128.* Tertiò Petr. Barbosa *l. c. 39.* Felin. & Affiqt. tradunt, utrobique curiam dici, & conveniri reum posse, ubi

ubi videlicet tribunalia, ut aiunt, & audientia fuerint, & ubi Pontifex vel Imperator fuerit sine tribunalibus ac ministris. Hæc opinio præplacet. Prima ejus pars sumitur ex Clem. *Ne Romani* 2. §. 2. de Elect. altera ex Clementis VIII. constitut. 45. Ratio est, quia ubi Rex est, ibi Curia Regia esse dicitur. Affid. decis. 265. Rebuff. in Concord. V. Extra Curiam, Butr. in cit. c. ult. de Foro comp. n. 23. Tiraq. de Nobilit. c. 30. n. 4. nec Princeps adstringitur ad jus dicendum in certo aliquo sui territorij loco; dommodo non dicat extra illud. Posse verò etiam ibi conventionem fieri, ubi tribunal & ministri regij sunt, tametsi Rex ibi non sit, dubium non est: cum ideo illi constituti sint, ut nomine Regis jus dicant.

130. Jam verò, quod dictum hactenus est, in communi domicilio quemvis conveniri posse, intelligendum duntaxat est, si ibi inveniatur, qui convenitur. Colligitur ex L. *Nemo C. de jurisd. omn. jud.* & L. 2. §. 4. & 5. ff. de Iudic. & resolvunt Covarr. pract. c. 6. prin. Oliva l. cit. q. 25. n. 3. ac alij. Ratio patet: quia quia nimium gravarentur subditi, si quantumvis longè absentes ad Curiam Principis promiscuè & passim ac in prima etiam instantia evocari possent: pariterque nimium oneraretur Curia Principis, si conventio indiscriminatim ibi fieri posset. Qua de causa erecta sunt plura tribunalia, diversique Judices dati sunt, ad quos subditi pro consequenda Justitia facile accedere possent. L. 1. §. *Capta ff. de Orig. Iur.* & L. 1. C. de Off. Præt. Prov. Afr. & ex eadem ratione in Republica Eccles. divisa sunt Provinciæ ac Dioceses, quarum iurisdictio turbaretur, magnaque induceretur confusio, si licitum semper foret summum tribunal adire.

131. Hinc juxta Trident. sess. 24. c. 20. de Refor. causæ omnes in prima instantia coram Ordinarijs locorum agitandæ sunt. Neque virtute literarum Apostol. quisquam ultra duas dietas extra suam Diocesein trahi potest. C. Nonnulli 28. de Rescript. quin nec ultra unam dietam. C. Statutum 11. §. 1. & 2. eod. in 6. Habant tamen tam SS. Pontifex quam Princeps secularis potestatem

O

tem

tem avocandi ad se causas & ex justis ac rationabilibus causis compellendi etiam absentes, ut coram ipsis compareant. Neque hæc potestas ab ipsis alienari potest, ut cum Luca de Penna, Guil. Benedicto, ac alijs existimat Covarr. c. 4. pract. n. 1. Quin in causis majoribus, quarum cognitio Sedi Apost. semper reservata fuit, etiam in prima instantia adeundus est SS. Pontifex. *C. Majores. de Baptis. C. 1. de Iurament. calum. C. 1. de Translat. Episc. Trident. l. c. Et c. 5. cit. sess. 24.* Quales sunt, quæ spectant ad intelligendos articulos Fidei, discernendos libros Canonicos, ad declarandum sensum SS. Literarum, eaque, quæ ad materiam, formam, & ministros Sacramentorum pertinent; item illæ, quæ pertinent ad jura, obligationes, & immunitates Ordinis Clericallis, ac criminales causas Episcoporum, quæ privationem aut depositionem merentur, ac illorum electionem, confirmationem, Beneficia Sedi Apost. reservata &c.

132. Sed etiam illi, qui in Curia reperiuntur, conveniri ibi non semper queunt, quando videlicet habent jus revocandi domum, seu petendi, ut causa ad forum ipsorum particulare, v.g. ad locum domicilij, ubi habitant, aut contractus, remittatur, quod in curia ad respondendum non sint instructi. Differt hoc jus revocandi domum à jure declinandi forum. Ille enim propriè declinat forum, qui non est subjectus jurisdictioni: is vero, qui domum revocat, subjectus quidem est jurisdictioni, ex aliqua tamen legitima causa respondere non tenetur. *Socin. in C. fin. de Foro comp. n. 61.* Jus autem revocandi domum habent non solum Legati, & qui in aulis Principum sunt; sed etiam missi à patria, & qui dicendi testimonij causâ ad Curiam evocantur. *L. 2. §. 2. ff. de Iudic. L. sed et si 28. §. fin. ff. ex quib. caus. major.*

133. Causæ, ex quibus jus revocandi competit, vel necessariae sunt, vel probabiles. *cit. C. ult. de Foro comp.* Prima necessaria est legationis. *cit. L. 2. §. 3.* Ratio est, ne Legatus ab officio legationis avocetur. *L. non alia L. de eo autem L. quid cum ff. de Iudic.* Idque procedit, non solum de Legato missò à Principe, sed

sed quolibet alio, qui à domino vel communitate mittitur ad Principem, & de Prælato in causa suæ Ecclesiæ ad Curiam veniente. Secunda: si quis evocatus sit à Principe, ut alijs respondeat. Si enim in alia causa conveniatur, quam ob eam, ad quam evocatus est, jus revocandi habet. Gloss. & Joan. Andr. *in cit. C. ult.* Gilhausen *arb. judic. c. 1. p. 2. §. 5. n. 4.* Tertia: si evocatus est testimonij ferendi causâ. *cit. L. 2. §. 3.* Quarta: si vocatur causâ judicandi. *cit. L. 2. §. 2.* quia in his casibus parere evocanti tenetur. Sunt præter has causas necessarias aliæ justæ & probabiles, quas dicunt *quasi necessarias*. Qualis est causa appellationis: nam *ei quoque, qui ipse provocavit, non imponitur necessitas intra tempora provocationis exercenda, Rome vel alio loco, ubi provocatio exercetur, alijs pulsantibus respondere*, ut ait JC. *cit. L. 2. §. 3.* ubi similis causa additur, *cum videlicet, qui tutelæ reddendæ causâ Romam erat evocatus, alterius tutelæ causâ, cuius causâ non erat evocatus, non debere compelli judicium suscipere.* Qvod Innocent *in cit. C. ult.* ad quæcunque causam rationis ob administrationem reddendæ extendit per *L. 1. & 2. C. ubi de Crim. agi oport.* Addant Gloss. *in cit. L. 2. §. 3. V. causâ venerat*, Butr. Panor. & Felin. *in cit. C. ult.* & hoc teste eomunis DD. sufficere ad petendam revocationem quæcunque aliam causam justam & probabilem, ex qua aliquis ad Curiam venerit, ut si quis voti implendi causâ Romam eat aut peregrinationis; aut, uti cit. Glossa ait, si quis ad locum Curiae accedat causâ visendi sui filij ibidem Studijs vacantem. Ut adeò *juxta* *citt. DD. soli illi jus revocandi domum non habeant, qui Romam, vel Viennam veniunt ex causa omnino voluntaria.* Gilhausen *L. c. n. 5.* Requiritur tamen *cit. C. ult. de Foro comp.* causa necessaria, ut adeò *juxta SS. Canones quæcunque alia probabilis & justa non sufficiat.* Peregrin. *de Fideicomiss. art. 53. n. 7.* Petr. Barbosa *in cit. L. 2. §. 3. n. 326.*

<sup>134.</sup> Quamquam autem Legati in Curia Principis vel ejus Provincia conueniri nequeant ratione contractus vel delicti, etiam

O 2

ibidem,

ibidem, at ante legationem, initi aut commissi, ut cum communi tradunt Covarr. c. 5. pract. n. 2. §. Et tamen, & Barbosa l. c. n. 104. alij tamen jus revocandi domum non habent, sed conveniri possunt ratione contractus ibidem quocunque tempore celebrati, vel delicti commissi; nisi interim actioni præscriperint cit. L. 2. §. 4. & DD. ibi, Panor. & Felin. l. c. Covarr. l. c. §. 5. det. Barbosa l. c. n. 111. Quin ij, qui Legati non sunt, jus revocabandi non habent, si convenientur in curia de contractibus aut delictis non in sua provincia ac loco domicilij, sed alibi commissis: ut adeò jus illud revocandi solum habeant, si in sua civitate aut intra suam provinciam contraxerunt, ut textum cit. l. 2. §. 5. explicat Glossa communiter recepta, & Glossa in cit. c. ult. V. Compello. Sed neque Legati, multoque minus alij, jus revocandi domum habent, quando tempore actio esset peritura ob eorum absentiam à domicilio vel provincia: cogit enim possunt ad litem contestandam, ne adversario sua actio pereat. L. 28. §. 4. ff. de Iudic. & ibi Glossa ac DD. At ubi primum lis fuerit contestata, causam remittendam esse ad Judicem competentem domicilij, tradunt Bart. & Angel in cit. §. 4. Barbosa l. c. n. 213. Oliva p. 3. For. Eccl. q. 12. n. 16. Sitamen actio foret talis, qua per litis contestationem non perpetuatur, uti est actio de Dolo L. fin. C. de Dolo. non sufficeret litis contestatio, sed causa in curia terminanda foret. Bart. l. c. n. 210. Oliva l. c. n. 17. Quod semper procedit, quotiescumque periculum in mora est. cit. L. 28. §. 1. Angel ibi. Barbosa l. c. n. 212.

135. Duo hic ex plurimis, quae de hoc jure revocandi domum tradunt Barbosa & Oliva ll. cc. Donell. L. 17. Coment. c. 14. Em. Gonzal. in C. ult. de Foro comp. addi expedit. Primum est, quod Judex, coram quo excipitur ex privilegio revocandi, potest ac debet, saltem parte petente, statuere terminum excipienti, intra quem compareat coram Judice domicilij, cumque cogere ad cavendum de judicio fisti, juxta cit. L. 2. §. 6 & ibi Glossa, Bart. ac DD. Panor. l. c. n. 49. Quod universum de omni Judice etiam incom-

incompetente, qui remittit partes ad instantiam excipientis, tradit post Bart. Alex. Castr. Dec. Felin. ac alios Barbosa *l. c. n. 365.* Non tamen opus est cautione poenali, vel juratoriâ, aut fidejusso-riâ; sed sufficit promissio simplex. *cit. L. 2. §. 6.* Alterum est, cùm privilegium revocandi domum sit exceptio instar declinatoriæ fori, opponendam esse ante litis contestationem. Marian. *l. c. n. 6.* Felin. *l. c. col. ult. & in C. cum ordinem de Rescript. n. 15.* Em. Gon-  
zal. *l. c.* Hæc porrò inutiliter disputata forent quoad Curiam Ro-  
manam, si verum esset, quod Felin. *cit. col. ult. v. ult.* tradit, juxta  
praxin illius Curiæ non permitti revocationem. Quæ tamen pra-  
xis quia dura est, nec à recentioribus DD. refertur, idcirco vel  
nunquam extitit vel sublata rursus fuit.

## C A P U T II.

### De Foro Delicti.

#### §. I.

##### *An per Delictum Forum acqui- ratur.*

#### S U M M A R I U M.

- 136. *Delinquens forum sortitur in loco delicti.*
- 137. *Etiam privilegiatus.*
- 138. *Tametsi habeat privilegium personale.*
- 139. *Nisi sit Regularis, aut aliud privilegium in Corpore Iuris clausum habeat.*
- 140. *Mandans puniri potest, ubi delictum mandatum est patra-  
tum.*
- 141. *Forum Pœnitentiale non acquiritur in loco delicti.*

136. Forum Domicilij universale esse, & cum alijs foris (ex-  
cepto foro Feudi & rei sitæ, de quo infrà *n. 216.*) concurrere,  
dixi *n. 103.* Unde subditus in loco sui domicilij propter crimen

O 3

ubicun-